

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- प्रधानमंत्री नरेन्द्र मोदी होर अज्ज आकाशवाणी पर प्रसारत होने आले कार्यक्रम “मन की बात” राएं अपने बचार सांझे करगंन।
- उपराज्यपाल मनोज सिन्हा होरें आखेआ जे आतंकवाद दी नमीं चुनौतिएं कन्नै निबड़ने लेई नमीं रणनीतिएं गी अपनाया जा’रदा ऐ।
- एडीजीपी जम्मू आनंद जैन होरें सेना, जम्मू कश्मीर पुलस ते विशेष बल दे सांझे सिखलाई सत्र दरान बलें दी सराहना कीती।
- केन्द्र शासत प्रदेश जम्मू कश्मीर दी विधानसभा दा पैहला सत्र 4 नवम्बर गीते संसद दी सांझी बैठक 26 नवम्बर गी लग्गोग।
- केन्द्री राज्य मंत्री डॉ. जितेन्द्र सिंह होरें आखेआ जे 2025 तगर भारत कश अपना अंतरिक्ष केन्द्र होग।

<><><><><><>

PM-MKB

प्रधानमंत्री नरेन्द्र मोदी होर अज्ज बडलै 11 बजे आकाशवाणी परा प्रसारत होने आले अपने महावार कार्यक्रम मन की बात राएं लोकें कन्नै अपने बचार सांझे करगंन। एह इस कार्यक्रम दी 115मीं किश्त होग। इस कार्यक्रम गी आकाशवाणी ते दूरदर्शन दे समूलवे नेटवर्क पर प्रसारत कीता जाग। आकाशवाणी समाचार दी वैबसाइट ते न्यूज ऑन एयर मोबाइल ऐप पर बी इस कार्यक्रम दा प्रसारण होग।

प्रधानमंत्री हुंदे इस कार्यक्रम गी आकाशवाणी समाचार, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कन्नो कन्नी प्रसारत कीता जाग। आकाशवाणी इस कार्यक्रम दे हिंदी प्रसारण दे तुरत परैंत क्षेत्रीय भाषाएं च बी एहदा प्रसारण करोग।

<><><><><><>

LG Terrorism

उपराज्यपाल मनोज सिन्हा होरें आखेआ जे जम्मू कश्मीर च आतंकवादी चुनौती कन्नै निबड़ने लेई नमीं रणनीति तैआर कीती गई ऐ। हुमहमामा एसटीसी च बीएसएफ रंगरूटें दी पासिंग आउट परेड गी संबोधत करदे होई उपराज्यपाल होरें आखेआ जे सरकार मजूद ते उपलब्ध संसाधने ते अपनी पूरी समर्थ कन्नै आतंकवादिएं दे पूरे पराते तंत्र गी खत्म करने लेई वचनबद्ध ऐ। उनें आखेआ जे सरकार दी तरजीह बीएसएफ, सेना, पुलस ते होरने अजेंसिएं बश्कार नेड़मा तालमेल बनाने पर ऐ। श्री सिन्हा होरें आखेआ जे पाकिस्तान जम्मू कश्मीर च आतंकवादी गतिविधिएं गी बढ़ावा देने ते उनेंगी अंजाम देने दिएं नापाक कोशशसं करा'रदा ऐ जे सरकार ते सुरक्षाबलें दा मकसद आतंकवाद गी जड़ थमां खत्म करना ऐ ते ऐसा माहौल तैआर करना ऐ जित्थें नागरिक अपने सुखने ते आसे तांगें गी पूरा करी सकन। सिन्हा होरें आखेआ जे घाटी च जिन्ना बी मसूम लोकें दा खून बगाया गेदा ऐ ओहदी हर इक बूंद दा परता लैता जाग ते आतंकवाद दे पूरे पराते तंत्र गी खत्म करने आस्तै पूरी समर्थ दा इस्तेमाल कीता जाग।

<><><><><><>

ADGP-Jammu

जम्मू जोन दे एडीजीपी आनंद जैन होरें कल सुजवां मिल्ट्री बेस पर भारतीय सेना दे 1 पैरा स्पैशल फोर्स ते जम्मू कश्मीर पुलस दे एसओजी ग्रुप दे टकोहदे सांझे सिखलाई च हिस्सा लैता। म्हीने भर चलै दे इस कार्यक्रम च दौनें बलें दी परिचालन समर्थाएं गी बधाने ते इलाके च सुरक्षा अभियाने तांई बद्ध शा बद्ध तालमेल गी बढ़ावा देने पर ध्यान दित्ता गेआ। इस मौके अपने संबोधन च श्री जैन होरें हसखलाई दरान कमांडो दे समर्थण, पेशेवराना रवैये ते सैहयोग दी सराहना कीती। उनें गलाया जे इस चाल्ली दे सांझे अभ्यास कन्नै सेना ते जम्मू कश्मीर पुलस दौनें गी कनून बवस्था बनाए रखने च मदद थ्होग। उनें मेद जताई जे एहदे कन्नै इलाकाई स्थिरता लेई चुनौतिएं दा मकाबला करने च बी बलें दी समर्थ च बाद्धा होग।

<><><><><><>

NZC Meet

केन्द्री गृहमंत्री अमित शाह होर अगले म्हीने नवम्बर च चंडीगढ़ स्थित ऊर्जा क्षेत्र परिषद एनजैडसी दी बैठक दी प्रधानता करगन जेह्दे च जम्मू कश्मीर ते लद्दाख केन्द्र शासत प्रदेशें दे नुमायंदे बी हिस्सा लेंगन। बैठक च राज्यें ते केन्द्र शासत प्रदेशें कन्नै जुड़े दे बक्ख-बक्ख मुद्दे पर चर्चा कीती जाग। जम्मू कश्मीर च नमीं सरकार दे गठन परेंत एनजैडसी दी एह पैहली बैठक होग। मेद ऐ ले बैठक च मुख्यमंत्री उमर अब्दुल्ला होर बी हिस्सा लेंगन। बैठक दी मेजबानी हरियाणा सरकार करा'रदी ऐ। पिछले ब'रे एह बैठक अमृतसर च लग्गी ही। अफसरें दस्सेआ जे बैठक च जम्मू कश्मीर, लद्दाख, हिमाचल प्रदेश, हरियाणा, पंजाब, नमीं दिल्ली ते राजस्थान सनें मिंबर राज्यें ते केन्द्र शासत प्रदेशें कन्ने सरबंधत सब्बने मुद्दे पुट्टे जांगन, जेह्दी तरीक अजे तैह नेई होइ ऐ। पर एह नवम्बर म्हीने दे खीरले हफ्ते च लग्गोग। सूत्रें दस्सेआ जे एनजैडसी बैठक दरान कनून बवसी, नशीले पद्धार्थे दी तस्करी, पानी, बिजली ते सरहद सरबंधी मुद्दे सनें बक्ख-बक्ख मामलें पर गल्लबात कीती जाग।

<><><><><><>

BBBP

बेटी बचाओ बेटी पढ़ाओ कार्यक्रम तैहत समाज कल्याण विभाग ने रामबन जिले च बक्ख-बक्ख सतहें दे रोजगार ते परामर्श केन्द्र सीपत कीते न। इनें केद्रे च मैहकमा बक्ख-बक्ख रोजगारें दे मौके बारे नोजवानें गी अवगत करोआया जंदा ऐ। इन्ना गै नेई मैहकमा कुड़िएं दी पढ़ाई लखाई ते भलाई बेह्तरी गी बढ़ावा देने, लैंगिक समानता गी प्रोत्साहित करने ते होर किश मुद्दे पर बी टकोह्दा ध्यान देआ'रदा ऐ। इस सरबंधे च आकाशवाणी कन्नै गल्लबात करदे होई रामबन दे जिला समाज कल्याण अधिकारी राहुल गुप्ता होरें आखेआ.....

<><><><><><>

JK- Accession Day

कल जम्मू कश्मीर विलय दिवस मनाया गेआ, जेह्दे च शहीदें गी श्रद्धांजलि दिंदे होई जम्मू कश्मीर गी भारत दा हिस्सा अनाने आली जिंदु दा बलिदान देने आलें गी चेता कीता। इस मौके बक्ख-बक्ख सियासी ते समाजी संगठणें आस्सेआ नेके कार्यक्रमें दा सरिस्ता कीता गेआ। इस सरबंधे च ब्रिगेडियर राजिन्द्र सिंह चौक पर इक मुख् कार्यक्रम दा आयोजन कीता गेआ जेह्दे च साबका फौजिएं, राइजिंग स्टार कोर दे कम्म करा'रदे अफसरें, जवानें ते होर मन्ने परमन्ने दे लोक ब्रिगेडियर राजिन्द्र सिंह जम्वाल होरें गी भाव भरोची श्रद्धांजलि भेंट कीती। उनेंगी कश्मीर दे रक्षक दे तौरा पर चेता कीता जंदा ऐ।

ब्रिगेडियर होरें गी श्रद्धांजलि देने आलें च मेजर जनरल रिटार्यड गोवर्धन सिंह जम्वाल, गुलचैन सिंह चाढ़क ते होर दुए शामिल हे। भारतीय जनता पार्टी दी कश्मीर इकाई नै जवाहर नगर श्रीनगर स्थित पार्टी मुख्यालय च इक समारोह लोआइयै विलय दिवस मनाया। कार्यक्रम च पार्टी कार्यकर्ताएं, वरिष्ठ लीडरें ते बसनीकें जम्मू कश्मीर दे इतिहास दे इस महत्वै आले ध्याड़े गी जोश-जज्बे कन्नै मनाया।

<><><><><><>

JK-Assembly

केन्द्र शासत प्रदेश जम्मू कश्मीर विधानसभा दा पैहला सत्र 4 नवम्बर गी लग्गोग। एह सत्र उपराज्यपाल मनोज सिन्हा हुंदे संबोधन कन्नै बडले साढ़ 11 बजे शुरू होग। 17 बक्तूबर गी केन्द्र शासत प्रदेश दी पैहली कैबिनेट बैठक च सत्र लोआने बारे सिफारश कीती गई। पैहली बैठक मुख्यमंत्री उमर अब्दुल्ला हुंदी अध्यक्षता च होई ही। सत्र दरान पैहले स्पीकर दा बी चयन कीता जाग। एहदे थमां पैहले उपराज्यपाल होरें ईदगाह थमां विधायक मुबारक गुल होरें गी प्रोटेम स्पीकर दे तौर पर सगंध दोआई ही। स्पीकर दे तौर पर नियुक्ति आस्तै केई नां बारे चर्चा सामने आई, पर इस द्रौड़ च सब्बने थमां अगगे नैशनल कांफ्रेंस दे नेता ते 7 बारी विधायक अब्दुल रहीम राथर हुंदा ऐ। हाल च संपर्क होए दे विधानसभा चुनाएं च नैशनल कांफ्रेंस गी 42 सीटां हासल होइयां। पार्टी अपनी भ्याल कांग्रेस ते होरने दुए दे समर्थन कन्नै 55 विधायकें दा समर्थन ऐ। दूई भेठा भारतीय जनता पार्टी कश 29 विधायक न।

<><><><><><>

Parliament Session

टधिकारिण दस्सेआ जे भारतीय संविधान गी अपनाने दी 75मीं ब'रेगंड मनाने लेई औंदी 26 नवम्बर गी संसद दे दौनें सदनें दी टकोहदी सांझी बैठक लगने दी संभावना ऐ। लोकसभा ते राज्यसभा दी सांझी बैठक संविधान सदन दे सेंट्रल हाल च लग्गी सकदी ऐ जित्थें संविधान सभा नै 26 नवम्बर 1949 गी संविधान गी अपनाया हा ते एह 26 जनवरी 1950 गी लागू होआ हा। पैहले 26 नवम्बर गी राश्ट्री कनून दिवस दे तौरा पर मनाया जंदा हा। 1015 च बी.आर.अम्बेडकर हुंदी 125मीं जयंति मौके सरकारै लोकें गी संवैधानिक मूलै पालमा करने च प्रोत्साहित करने लेई 26 नवम्बर गी संविधान दिवस दे रूपै च घोषत कीता गेआं

<><><><><><>

Jitendra Singh

विज्ञान ते टेक्नोलाजी मैहकमे दे केन्द्री मंत्री डाक्टर जीतेन्द्र सिंह होरें आखेआ ऐ जे 2035 तगर भारत दा अपना अंतरिक्ष केन्द्र होग जिसी भारती अंतरिक्ष स्टेशन दे नांऽ कन्नै जानेआ जाहग। कल नमीं दिल्ली च भारती अंतरिक्ष अनुसंधान संगठन – इसरो ते बायोटेक्नोलाजी सरबंधी विभाग बश्कार सैहमती पत्तरै पर दस्तख्त कीते जाने दे मौके पर डाक्टर सिंह होरें एह घोषणा कीती। इस सैहमति पत्तर दा मकसद जैविक-टेक्नोलाजी गी अंतरिक्ष सरबंधी टेक्नोलाजी दे कन्नै संगठित करना ऐ जेह्दे नै देसै च साईसी खेत्तर च नमिएं काह्डें आहले इक नमें जुगै दी शुरुआत होग। एह्दे अलावा सैहमति पत्र च भारती अंतरिक्ष स्टेशन दी स्थापना ते बायो ई-3 यानि अर्थबवस्था, पर्यावरण ते रोजगार लेई जैविक टेक्नोलाजी सरबंधी नीति ज्नेही केई प्रमुख पैहलकदमिएं दी रूपरेखा तैयार करने दी गल्ल आखी गई ऐ। सरकार दे मताबक, एह सैहयोग माइक्रोग्रैविटी रिसर्च, स्पेस बायोटेक्नोलॉजी, स्पेस बायोमैन्युफैक्चरिंग, बायोएस्ट्रोनॉटिक्स ते स्पेस बायोलॉजी ज्नेह् खेत्तरें पर केंद्रित होग। डॉ. सिंह होरें आखेआ जे सार्वजनिक ते निजी सांझ-भ्याली भारत दे अंतरिक्ष खेत्तर दे तेजिआ कन्नै विकास च मददगार रेई ऐ। उनें आखेआ जे अंतरिक्ष स्टार्टअप्स दी गिनतरी च बड़ा मता बाददा होआ ऐ ते तकरीबन 300 स्टार्टअप हून अंतरिक्ष सरबंधी अर्थबवस्था च जोगदान देआ करदे न। डॉ. सिंह होरें आखेआ जे इस भागीदारी कन्नै राष्ट्रीय मनुक्खी अंतरिक्ष कार्यक्रम गी बी लाह पुज्जोग। एह्दे अलावा कचरे दे कुशल प्रबंधन ते उसी परतियै इस्तेमाल-जोग बनाने यानि रीसाइक्लिंग लेई मनुक्खी सेहत सरबंधी शोध, फार्मास्यूटिकल्स, इलाज-मुआलते ते जैव-आधारित तकनीकें च नमिएं काह्डें गी बढ़ावा थोने दी बी मेद ऐ।

<><><><><><>

Farmer Udhampur

सरकार दे समग्र कृषि विकास कार्यक्रम एचएडीपी तैहत अज्जै कल्लै दी सहूलत कन्नै लैस स्थापत कीते गेदे पालीहाउस करियै उधमपुर दे करसान फसल दे झाड़ च बड़ा मता बाद्धा दिखा करदे न। राई-बाई बक्खी एह क्रांतिकारी नजरिया कैबल डांगा ग्रां च अपनियां जड़ां फला करदा ऐ। जेह्दे कन्नै हंसराज जनेह् करसानें दी नमिएं तकनीकें तगर पुज्ज बना'रदी ऐ। आकाशवाणी कन्नै गल्ल करदे होई पिछले 50एं ब'रें थमां खेती करा'रदे रायलाल होरें आखेआ जे एह खेती तांई इक बेह्तरनीन स्कीम ऐ ते खुले मैदानें दे मकाबले च उंदे झाड़ च बड़ा मता बाद्धा होआ ऐ। उनें इस कम्में च मदाद उपलब्ध करोआने लेई प्रशासन दी सराहना कीती ते आखेआ.....

तोआई कृषि अधिकारी उधमपुर अजय शर्मा होरें आखेआ जे मैहकमे नै उधमपुर च 7-8 हाईटैक पालीहाउस स्थापत कीते न जेह्ड़ा करसानें गी बेमौसमी सब्जियां उगाने च मदाद करा'रदा ऐ। करसान ते अधिकारिएं आकाशवाणी कन्नै गल्ल करदे होई आखेआ.....

<><><><><><>